

KEREKE YA LUTERE MO BORWA JWA AFRIKA

/2013 Thero ka Sontaga wa 21 morago ga Trinitate, e le ka 20. 10. 2013

MO LEINENG LA MODIMO O E LENG RARA LE MORWA LE MOWA O O BOITSHEPO!

Sefela sa 185/192

Thapelo: Morena Jesu Keresete, re a go leboga, ka o re tlhophile gore re nne ditsala, badumedi le barutwa ba gago; ka o re senoletse lorato lo logolo lwa gago, lo o re biletsang ka lona gore re dumele mo go wena, re go rate, re nne re rate bangwe-ka-rona jaaka o re ratile, le gore re itumedisiwe ka boitumelo jo o re bo baakanyeditseng ka go re tlhotlheletsa gore re rate go dira tse re di laoletsweng ke wena. Ke gona re kopang ka fa tsholofetsong ya gago gore re go ikanye, fa e le maungo a Mowa o o Boitshepo wa gago, fa re abelwa maungo a magolo a ona a e leng lorato le boitumelo, re nne re itumelele thuso ka lorato lo logolo lwa gago. Amen.

Epistolo ka fa thulaganyong ya 2 e kwadilwe mo go Baefeso 6:10-17;

Efangele ka fa thulaganyong ya 1 e kwadilwe mo go Matheo 5:38-48.

A go ipolelwe tumelo ya bokeresete!

Sefela sa 243/253

Thapelo ya mmadi wa thero.

Efangele ka fa thulaganyong ya 5 e ntsha e kwadilwe mo go Johane 15:9-17, e re: Jesu a re: "Ke lo ratile, fela jaaka Rara a nthatile; nnelang ruri mo loratong lwa me. Fa lo utlwa ditaolo tsa me, lo tla nna mo loratong lwa me, fela jaaka nna ke utlwile ditaolo tsa ga Rre, mme ke ntse mo loratong lwa gagwe. Dilo tse ke di buile le lona gore boitumelo jwa me bo nne mo go lona, le gore boitumelo jwa lona bo tshale. Taolo ya me ke ya gore lo ratane, fela jaaka ke lo ratile. Ga go ope yo o nang le lorato lo lo fetang go lwa gore motho a ntshetse ditsala tsa gagwe botshelo jwa gagwe. Lona lo ka nna ditsala tsa me, fa lo dira tsotlhe tse ke di lo laelang. Ga ke tlhole ke lo bitsa batlhanka; gonne motlhanka ga a itse se morena ya gagwe a se dirang. Lona ke lo biditse ditsala; gonne tsotlhe tse ke di utlwileng mo go Rre ke di lo egetse. Ga se lona lo intlhaoletseng, ke nna ke itlhaoletseng lona, ke bile ke lo beile gore lo ye lo ungwe leungo, mme leungo la lona le nnele ruri, gore se lo ka se kopang Rara mo leineng la me, a se lo nee, le a e ka nna eng. Ke lo laela dilo tse, e le gore lo ratane." Amen.

Thero: Barategi mo Moreneng wa rona Jesu Keresete,¹ ke re: Ke boitumelo, fa motho a kgethwa, le a e le basimane ba sekolo ba ba kgethelwang setlhopho sa ntlha go tshameka motshameko wa kgwele a dinao, gongwe fa mongwe a kgethwa go nna tokololo ya palemente.

Jaanong re utlwa ka Lefoko la thero ya kajeno gore Jesu o itlhophetse badumedi le barutwa ba gagwe. Jesu o bua le barutwa ba gagwe, a ba raya, a re: "Ga se lona lo intlhaoletseng, ke nna ke itlhaoletseng lona." Ke thuto e e tiisang gore re diretswe lorato lo logolo ke Morena Jesu. Re diretswe ke ene se re palelwang ke go se itirela, gongwe go se ipaakanyetsa, jaaka re ipolela ka tlhaloso ya Artikele ya boraro mo Kategisimeng, re re: "Ke dumela gore ke palelwa ke go dumela mo go Jesu Keresete, Morena wa me ka tlhologanyo ya me, le fa e le ka thata ya me, le e seng go ikisa go ene ka tsona." Jesu o itlhaoletse barutwa ba gagwe. **Fela jalo o ntse a re itlhaolela.** A re gopoleng go tswa mo tshimologong gore ga a tlhophe fela, le e seng go kgetha fela. Mo kgethong le mo tlhaolong ya gagwe o na le mabaka, le maikaelelo. O re tlhophile. Mo tlhophong ya gagwe ga a tlhopolole. O tlhopho baleofi go nna bana ba Modimo, ka gonne ga a rate gore motho a latlhege, mme o rata gore batho botlhe ba dumele mo go ene, ba nne le boitshwarelo jwa maleo a bone le botshelo jo bo sa khutleng ka go dumela mo go ene. Maikaelelo a go re itlhaolela gore re nne ditsala, barutwa le badumedi ba gagwe ke a gore

1. re dumele mo go ene;

2. re tukisiwe mo loratong;

3. re abelwe boitumelo.

1. Jesu ga a tlhophe fela, o ka re: O apesitse go itlhaolela ga gagwe ka maikaelelo a a itumedisang; o re itlhaoletse **gore re dumele mo go ene.** Go dumela mo go ene ke go ikanya tshenolo e kgolo ya lorato e go nnela ruri mo loratong lwa gagwe ka fa Lefokong le le reng: "Ke lo ratile, fela jaaka Rara a nthatile; nnelang ruri mo loratong lwa me." Mo lefokong la thero ya kajeno o a tlhalosa gore o raya lorato lo lo ntsheng jang, a re: "Ga go ope yo o nang le lorato lo lo fetang lo lwa gore motho a ntshetse ditsala tsa gagwe botshelo jwa gagwe." Mme Jesu ga a ka a bo ntshetsa fela ditsala tsa gagwe, nyaya, o bo ntsheditse le baba ba gagwe ka go utlwa Rraagwe go ya mo losong, mo losong lwa sefapaano. Mo

¹ Lefoko la thero ya kajeno ya Sontaga wa 21 morago ga Moletlo wa Borarobongwe mo dinyageng tsa 2007 le 2001 le ne le sa rerwe, gonne ka Sontaga wa 21 mo dinyageng tseo re ne re gopola ntshwafatso ya kereke. Thero e e neng ya rongwa ka ngwaga wa 1995 ka Sontaga wa 21 morago ga moletlo wa Borarobongwe e phatlaladitswe mo lokwalong lwa dithero tsa Sezulu lo lo bidiwang "Ayikho insindiso ngomunye." Se sengwe ke fa dithero tse di neng tsa kwalwa ka Sezulu ka 1995 di ne di sa bolokwe mo khomphutha, se sengwe ke fa moruti yo o kopilweng go kwala thero ka Lefoko la thero ya kajeno a ne a sa e roma. Ka moo go kwadilwe thero ke yo o tshwanetseng go di kwala, fa a sa romelwe dithero.

10: 369 - 341/248

sefapaanong o rapeletse le babolai ba gagwe, a re: "Rara, ba itshwarele, gonne ga ba itse se ba se dirang." Maikaelelo a lorato lo logolo lwa gagwe ke fa a rata gore re nnele ruri mo loratong lo lwa gagwe ka tumelo.

2. Ka thuto ya bobedi ya lefoko la thero ya kajeno re a utlwa gore Jesu o re itlhaoletse go nna ditsala, barutwa, le badumedi ba gagwe ka go ikaelela **gore a re tukise mo loratong**. Ke re: Go itsiwe, fa dikgong di tla tuka molelo, le go phatsima sentle, fa di latlhelwa mo malatlheng a a tukang ka molelo. Go ntse fela jalo ka dipelo tse ditsididi, di tla tuka lorato, fa di atamedisiwa mo loratong lwa ga Keresete, fa motho a dirafatsa ditaolo tsa bofelo jwa ga Jesu, jaaka lefoko la thero ya kajeno le bua, le re: "Fa lo utlwa ditaolo tsa me, lo tla nna mo loratong lwa me, fela jaaka nna ke utlwile ditaolo tsa ga Rre, mme ke ntse mo loratong lwa gagwe." Go rewa ditaolo dife? Ga a bue fela ka ditaolo tse some, gonne yo o di utlwang, le go itlhatlhoba ka tsona, o lemoga ka pele gore di a mo sekisa, di mo senolela melato e mentsi a gagwe. Fa melao eo e dirisiwa ka tshwanelo, e tla re gogela mo go Keresete gore re kope boitshwarelo jwa ditlolo mo go ene. Le foo go tla diragala gore re nnele ruri mo loratong la gagwe, mme Jesu o bua ka ga dikaelo tse dingwe, o re raya ditaolo tsa gagwe, gore go rerwe Efangele ya gagwe, re tle re e utlwe, le gore baleofi ba kolobediwe mo leineng la Modimo o e leng Rara le Morwa le Mowa o o Boitshepo, go tsalwa sešwa, le go amogelwa go nna bana ba Modimo, re be re utlwe taelo e nngwe ya gagwe gore baleofi ba itshwarelwe maleo a bone mo boipobolong, ba utlwe le taletso ya gagwe gore ba je mmele wa gagwe mo selalelong, ba nwe madi a gagwe a re a tshologelelsweng go itshwarelwa dibe tsa rona. Gape Morena Jesu o rata gore re se ka ra lapa go rapela. Yo o tshegetsang ditaolo tseo tsa gagwe tse a di gateletseng bogolo mo bokhutlong jwa tsamao ya gagwe mo lefatsheng le morago ga tsogo ya gagwe o na le tsholofetso tota, fa pelo ya gagwe e tla tuka ka lorato gore a rate Morena Jesu le Rraagwe yo o re ratileng mo go kalo. Gape pelo e tla tuka lorato gore re ratane le ba bangwe, jaaka re ratilwe ke Morena Jesu Keresete.

3. Re na le tsholofetso tota gore ka molaetsa o montle o wa Efangele ya ga Keresete Mowa o o Boitshepo o tla ungwa maungo a a monate a ona. Lwa ntlha ke lorato. Lwa bobedi ke boitumelo ka fa tsholofetsong ya Lefoko la thero ya kajeno e e reng: Jesu a re: "Dilo tse ke di buile le lona gore boitumelo jwa me bo nne mo go lona, le gore boitumelo jwa lona bo tlale." Ke yona thuto ya boraro jwa lefoko la thero ya kajeno e e re bolelelang ka thanolo gore Jesu ga a ka tlhophela fela, mme o re itlhaolela go nna ditsala, barutwa, badumedi ba gagwe ka maikaelelo a mantle a gore re nne le boitumelo jo bo sa feleng mo go ene.

Go setse fela se le sengwe gore re femelwe mo potsong e e tshwenyang badumedi ba le bantsi, e e tsosang dipelaelo mo dipelong malebana le go tlhaolwa ke Morena go nna tsala, morutwa, modumedi wa gagwe, bogolo ga modumedi a itemoga ka gore tumelo, lorato, le boitumelo di tlhela botlalo? Ke fa le modumedi a botsa, a re: A o tlhaotswe ke Morena? A Morena a fenye dipotso tse di ntseng jalo tse di lekang go tshikinya tumelo ya rona ka mafoko jaaka ona a a re: "Ke ikanya gore yo o simolotseng tiro e e molemo mo go lona o tla e tswelatsa go ya a e fetsa ka letsatsi la ga Keresete Jesu," Bafil. 1:6; "re itse gore bone ba ba ratang Modimo, dilo tsotlhe di dira mmogo go ba tsalela molemo, e bong bone ba ba biditsweng ka fa boikaelelong jwa Modimo. Gonne ba o ba itsileng pele o ba tlhaotse e gore ba tshwane le popego ya Morwaa-ona, a tla a nne matsalwa-pele mo baneng ba le bantsi. Mme ba o ba tlhaotseng pele, e bile o ba biditse; ba o ba biditseng, e bile o ba siamisitse; ba o ba siamisitseng, e bile o ba galaleditse," Baroma 8:28-30. Ke lo eleletsa lotlhe gore lo tlhomamisediwe mo tumelong, fa go se na sepe se se ka lo kaoganyang le lorato lwa Modimo, lo lo mo go Keresete Jesu. Amen.

9. Thapelo: Morena, Modimo, Rara yo o mo legodimong, re a go leboga, ka o leka ka metlha ka Lefoko le le boitshepo la gago go tlosa dipelaelo tsotlhe mo dipelong tsa rona, gore re tiie, re tlhomame mo tumelong, fa o re amogetse go nna bana ba gago mo kolobetsong, le go nna ditsala, barutwa le badumedi ba ga Morwao yo o rategang Jesu Keresete. Morena, re a kopa gore o se lape mo tirong ya gago, mme o nne o tswelale go dira tiro ya lorato lwa gago mo go rona, gore re dumele mo go Morwao Jesu Keresete, re tuke mo loratong lwa go go rata bogolo go dilo tsotlhe, le go ratana le baagisanyi ba rona, jaaka re ratilwe ke Morwao yo o rategang Jesu Keresete, boitumelo jwa gagwe bo tlale mo go rona rotlhe. Re kopa jalo ka ntlha ya lorato lo lo mo go Jesu Keresete, Morwao, Morena Mopholosi wa rona. Amen.

Thapelo ya Morena: Rara wa rona yo o mo legodimong ...

10. Sefela sa 210/218

A kagiso ya Modimo e e fetang tlhologanyo yotlhe e boloke dipelo tsa rona le maikutlo a rona mo go Keresete Jesu, Morena, Morepholosi. Amen.

Thero eno e kwadilwe ke E. A. W. Weber ka ngwaga wa 2013
Kgatiso le go rongwa ga difthero tseo go tshagediwa ke kopano e e bidiwang The Lutheran Heritage Foundation.